



INATSISARTUNI

Partii Inuit
Randi Broberg

UPA 2014/132-1
26.3.2014

Pillugu siunnersuut: **Inatsisartut inatsisaat nr. xx ulloq xx xxxx Aatsitassat pillugit ingerlatallu tamatumunnga pingaarutillit pillugit inatsisartut inatsisaannut nr. 7, 7. december 2009-immersoq allannguutissamut tunngasoq (aatsitassat pillugit inatsit)** (Inuusutissarsiornermut Aatsitassanullu Naalakkersuisoq)

Partii Inuit maluginiarparput, innuttaasut akuutinneqannginnerat sunniuteqaqataasinnaaneranillu sumiginnaasimaneq, uuma siunnersuutip saqummiunneqarneragut Naalakkersuisooqatigiinniit nassuerutigineqartoq.

Taamaattumik erseqqissumik Naalakkersuisup saqummiussamini oqariartuutigisaa akerlilerparput, oqarmat siornatigut innuttaasut akuutinneqartarnerat tusarniaasarnerillu ajunngitsumik ingerlanneqartarsimasut.

Tamanna ilumuunngilaq piviusunillu takutitsinani; eqqaaginnartigu ukiup siuliani aatsitassat pinngoqqaatinik akullit qallorneqarsinnaanerannik ammaassineq - Inuit Ataqtigiit Naalakkersuisuutitaqarneranniilli suliaq nipaarsaarullugu sunaaffa aallarnerneqareersimasoq – sunnguamilluunniit innuttaasut susassaqtartut isumasioqqaarnagit amerlanerussuteqarnerinnaq tunngavilersuutigalugu akuersissutigineqartoq.

(tak. Immikkoortoq 709-711-mut tunngatillugu atugassarititaasussanut nalinginnaasunut september 2010-imeersunut tapiliussaq aamma sumiiffimmuut Kalaallit Nunnaata kujataani Kuannersuarmi akuersissummut 2010/02-mut tapiliussaq nr. 1 pillugit nassuiaat/Aatsitassarsiornermut Inuutissarsiornermut Naalakkersuisoqarfik/23. oktober 2013/Jens-Erik Kirkegaard).

Siunnersuutigineqartukkut anguniarneqarpoq, innuttaasut sunniuteqaqataasinnaanerisa tusarniaasarnerillu sumi qaqugukkullu pisarnissaasa erseqqissaavigineqarnissaat.

Partii Inuit tamanna pisariaqarluinnartutut nalilerparput, neriuutigalugu innuttaasutut inuiaqatigiit killingusaannut inissinneqartuarnerput piaarnerpaamik unitsinneqartariaqarmat.

Tusarniaasarnermut piffissaliussaq DK'imi tamatuma ileqqunera tunngavilersuutigalugu sap. akunnerinut 8'nut siunnersuummi sivilissusilerniarneqartoq, Partii Inuit isumaqatiginnatsigu erseqqissumik oqaatigissavarput.



INATSISARTUNI

Tusarniaanermi akissutigineqartut innersuussutigineqartullu qiviaraanni, sap. akunnerinut 8'nut sivisussusiliineq naammanngilluinnarpoq, innuttaasullu sunniuteqaqataasinnaanerinik illersuisuusaarnertut taasariaqarluni.

Tassami pisuussutinik uumaatsunik atuinissamut pilersaarutit annertuut pineqartillugit, taakkunungalu atasumik paasissutit annertuut paasiuminaassinnaasullu pineqartillugit, tusarniaanermut sap. akunnerinut 8'nut piffissaliussa q taannaajuassasoq siunnersuutigineqarpoq.

Tamannalu Partii Inuit erseqqissumik akerlaraarput, piffissaliussallu sap. akunnerinut 16'inut sivitsorneqarnissaa pissusissamisoorullugu (tak. siunnersuummi § 87 b. Imm. 2.).

Partii Inuit aamma pissusissamisuuinnartutut isigaarput, pilersaarutaaqqaartut sukumiisuunngikkaluit aamma siusissukkut innuttaasunut apuunneqartarnissaat tusarniaassutigineqartarnissaallu. Soorlu siunnersuummi aamma taaneqartoq.

Innuttaasunik tusarniaasernerit pisarsimasut ukiut kingulliit qulit kingumut qiviaraanni, Partii Inuit takusinnaavarput, innuttaasutut pisinnaatitaaffigut innarlerneqartuarsimasut; tassami paasissutissat uagut inuttut nammineq oqaatsigut atorlugit atuarneqarsinnaaneq ajormata.

Tassunga atasumik Partii Inuit erseqqissumik piumasaraarput, siunissami tusarniaassutit oqaatsivut atorlugit pinngitsooratik allassimasarnissaat. Danskisuumullu nutserinerit unitsinneqassasut – ilaatigut aningaasartuutikillisaanerup uagutsinnullu isumalimmik ingerlatsisoqarnissaata aqqani.

Tusarniaanernut atasumik aningaasaateqarfeqalernissamik siunnersuut Partii Inuit ilalernartipparput. Aningaasaateqarfiulli aningaasanik agguaanissaminut maleruagassai pisinnaatinneqarneralu, erseqqissumik paatsuunganangitsumillu ilusilerneqartariaqarpoq – tassani uagut inuiattut pisinnaatitaaffitta soqutigisattalu eqqortinneqarnissaat pingaartillugu.

Tusarniaanermut aningaasaateqarfiup nukittorsaaviginiarpaa innuttaasut akuutinneqartarnerat. Tamannali uagutsinnut uppernassuseqassappat, paasissutissat oqaatsivut atorlugit allassimanissaat avaqqunneqarsinnaanngilaq.

Paasissutissat qanoq tamakkiitigisut innuttaasunut saqqummiunneqartarnissaannik apeqqummi Partii Inuit erseqqissaatigiinnassavarput qitiusumik pingaartikkatsigu, paasissutissat tusarniaassutigineqartunut attuumaassutillit tamakkiisumik saqqummiunneqassatinnagit, qarasaasiakkut attaveqaatit atorlugit aaneqarsinnaaneri pinngitsoorani innuttaasunut periarfissaatinneqassasoq.

Ataatsimut eqikkarlugu Partii Inuit oqariartuutigaarput allannguutissatut siunnersuut taama isikkoqartillugu akuersaarsinnaannginnatsigu. Peqqutigalugu uagut inuttut pisinnaatitaaffitta



INATSISARTUNI

eqqortinneqarnissaat siunnersuutikkut qulakkeerneqanngimmat. Qulaani taaneqartut tunngavigalugit Partii Inuit innersuussutigissavarput, siunnersuutip aappassaaneerneqannginnerani Aatsitassanut Ataatsimiititamit siunnersuut nalilersuivigineqaqqissasoq. Pingaartillugu innuttaasut oqartussaaqataanerisa sunniuteqarsinnaanerisalu nalorninaatsumik qulakkeerneqarnissaat.

Ataatsimiititap pineqartup minnerpaamik nalilersuivigisariaqarpaa, siunnersuut taama isikkoqartillugu akuerissagaanni, ilumut innuttaasutut pisinnaatitaaffitsinnik qulakkeerinnittuunersoq.